



Unioni de is Comunas de su Partiolla e de su Campidanu de Bàsciu

Progetu “Sa Lingua Sarda 2”, Avisu TuLIS - Annualidadi 2023



Comunu de Barrabi



Comunu de Partiolla/Sici



Comunu de Donori



Comunu de Serdiana



Comunu de Sètimu



Comunu de Solèminis



Regioni Autònoma de Sardigna - Lei 482/99 e L.R. 22/2018



Comunu de Serdiana

SU CASTEDDU

In su logu urbanìsticu de su bixinau antigu ddoi est una de is struturas prus de importu de sa bidida, sa Domu Carcassona, connota mellus cumenti Casteddu Roberti.

Unu portali cun rosta amostat su stemma de sa famìllia, e fait inrai in una corti chi acabat cun su fàbricu. Est fatu de una parti centrali (sa residèntzia de bivi), a duus pianus, e de duus fràigus a is ladus, a unu pianu e pagu pagu prus bàscius, acostiaus a duas turris merladas a pranta cuadrada chi s'incarant faci a innantis.

In su de XVIII sèc. Efisio Luigi Carcassona, aligheresu de orìgini, iat arriciu che fèudu sa bidida de Serdiana e su tìtulu de “Marchese di San Saverio”. Filla sua Giovanna iat cojau a don Tomaso Nin. Sa filla de cussus, Luisa, si fiat cojada cun su conti Edmondo Roberti de Castolvero (nòbili piemontesu, amantiosu de archeologia), e duncas sa Domu de Serdiana dda connoscint puru cumenti a Castello Roberti.

S'ùrtimu marchesi iat bèndiu sa Domu a tres messajus continentalis: Vandoni, Mussioli e Restano; pustis de 18 annus de apesonamentu, Francesco Angius, su babbu de is meris de oi, dd'iat comporada totu intrea.

(*) *“Ville e Palazzi della Nobiltà in Sardegna”* – Sergio Serra.

(*) *“Serdiana: storia, geografia, economia”* - AA.VV.

Su centru stòrigu Serdianesu est furmau ancora siat de domus simpris e siat de atras prus mannas. Sa domu traditzionali, po su prus, est pesada chene de fundamentas, a pitzu de unu pillu de argidda tostada cun una tzoculadura chene traballai cementada cun perdixeddas piticas e ludu, su materiali de fraigadura impreau po is murus est ludu e palla, fatu a matoni, chi ddi nant su làdiri.

Sa crobetura est a duus spoidròxius postu in pitzu de duus murus, in pitzu de una travi “di colmo” e in is intraiaduras de linna de tzinnìpiri e est pompiada de una cannitzada chi faint sa basi po nci ponni is tèulas muradas cun ludu e cracina. Is aposentus de sa domu funt cuncordaus e pensaus po is fainas de domu e po cussas de trabballu puru. S’inforas de totu su fàbricu est fatu prus bellu cun su portali, chi est s’intrada ùnica po sa domu. Su portali, furmau de sa tzoculadura de basi, aundi ddoi funt postus is pilastrus, chi tenint una grunissa de imposta, est alliongiu a s’arcu, e in sa parti centrali est beni ammostada sa crai de bòveda chi de costumau ammostat s’annu de fraigadura o is lìteras de su nòmini de su meri; bortas meda is perdas de arenària puru funt sculpius cun furmas geomètricas e froris cumentis is frigus de is maistus cadelanus. In generali, aundi ddoi est su portali, a intru de sa pratza ddoi est unu logu crobetu chi in ierru serbit a chistiri su carru de bois. Su portali beru est de linna e furmau de duas antas; a manu dereta ddoi est sa genna de intrada, e sa forma sua benit fata in sa parti de manca puru. Sa parti de mesu tenit medas bortas is frigus de linna chi arregordant is rajus de su soli o unas màrigas piticheddas totu frorias. Dònna portali tenit unu batenti de ferru trabballau chi ammostat una conca de leoni o de calincunu atru animali, mentras s’arrulloni amostat una manu chi pòmpiat una bòcia de ferru. Cun su tempus, unas cantas de custas domu ddas ant aconciadas e mudadas, e in is primus annus de s’Otuxentus, ant fraigau puru cussas “a palatzu” cun una struttura longa, chi donat a is domus una bisura prus urbana.